

Rossi

I.

Ab lo pascor ? m'es bel q'eu chant,
en estiu, a l'entran de mai,
can par la flors ? sobre·l verchant,
e son reverdezit li glai;
mout mi val pauc lo temps cortes,
q'eu non ai joi ni non l'ades,
ni de sa compagnia no·m lau.

II.

Per qe d'amor ? an atretan
li malvas enojos savai
con li meillor ? e·l plus prezan,
Jovenz e Faig[s] fraing e dechai
e Malvestatz a son luec pres
en amistatz, c'amics non es
amatz ni d'amigua no·s jau.

III.

Ben sai qe lor ? es mal estan
als moilleratz, car se fan gai
domnejador ? ni drudejan,
e·l guizardos qe lor n'eschai
ditz el reprocher lo pajes:
«Qi glazi fai, a glazi es
feritz d'eis lo seu colp mortau»

IV.

Fals amador, ? al meu semblan,
vostr'er lo danz e no·n pueis mai;
de gran folor ? es acordan,
can l'us l'autre gali·e trai;
e, pos vos [o] aves enques,
drut, moiller et marit, tug tres,
sias del pechat comunau.

V.

El fuec major ? seretz *arden*
al juzizi del derrer plai,
enganador, ? fel, deslian,
en la pena qe no trasvai,
on sera totz lo mals e·l bes
iutiatz; e no·n clam Merces

donna c?aja drut desleiau.

VI.

Non a valor ? d?aissi enan
cela c?ab dos ni ab tres jai
? et ai! n'enqor ? lo cor Tristan! ?
qe Dieus tan falsa no·n fetz sai;
mielz li fora ja non nasqes
enanz qe failliment fe[e]s,
don er parlat tro en Peitau.

- letto 487 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/rossi-0>